

## ■ CONVIVENZA

# Sco da leger l'agen diari – mo mender!

DA VIOLA CADRUVI\*

Cun 16 onns hai jau scrit ina fanfiction. Fanfictions èn istorgias che vegnan scrittas da fans en in mund da fantasia gia existent. Fitg populars èn per exempel ils munds da «Harry Potter», «Lord of the Rings», «Star Trek» u era da la seria da televisiun «Sherlock». Ins nizzegia pia il mund, las figuras, la plat-tafurma ch'insatgi auter ha creà e scriva atgnas istorgias. E savens èn ils auturs e las auturas da questas ficziuns fans en la vegliadetgna da teenager.

Mia fanfiction giugava (natiralmain) en il mund da «Harry Potter». Ella tractava las istorgias d'amur dals protagonistes Harry, Hermine, Ron e Ginny, ina tematica che l'autura J. K. Rowling n'ha tenor mia opiniun betg pudì approfondar talmain, perquai ch'ella aveva avunda da far cun il fil narrativ principal. Las relaziuns ed aventuras d'amur vegnan descrittas mo fitg marginalmain en ils cudeschs da Rowling.

Sco lectura da 16 onns fissan dentant questas istorgias stadas fitg interessantas. Tge auter che sex ed amur po era fatschentar in tscharvè pubertar? E quai era lura pia er il cuntegn da mia fanfiction: 140 paginas A4 en Word, scrittira 12, scrit durant pli u main in onn, plain patos, kitsch e



sex. Ed ussa, passa diesch onns pli tard, hai jau puspè ina giada prendì questa istorgia or dal truet ed jau poss garantir: Sche jau n'avess betg empermess ad ina collega da scriver sur da mias experientschas da questa re-lectura, n'avess jau mai legì a fin questa tschavattada.

U schia m'imagesch jau l'experientscha da leger suenter blers onns puspè ina giada ils agens diaris – mo ch'igl è anc diesch giadas mender, perquai ch'ins sa ch'ins ha publictà questas istorgias en l'internet ed uschia parti sias fantasias intimas e peniblas cun la publicità. Sco scenziada da litteratura, feminista, gea sco dunna stoss jau conceder: Tge hai jau pomai pensà da lez temp?

Cler, jau hai era chattà scenas e parts che n'eran betg talmain nau-schas, almain ord vista feministica. Silmain prendan las giuvnas en il text per il solit l'iniziativa, sch'i va per

lur desideris e giavischs sexuals. Mender èn bunamain las figuras masculinas. Co pudeva jau avair ideas da la virilitad talmain incumpletas, ideals talmain machistics? Jau poss mo declarar quai cun mia inexperientscha, cun ils ideals che jau enconuscheva e copiava or da litteratura e films populars. Ma jau na sai betg, sche quai è propi ina stgiss...

La re-lectura da mia Ltschavattada giuvenila ha pia evocà ina massa dumondas. Duess jau arder mes diaris anc existents da mia giuventetgna, avant che jau vegn anc sin l'idea da leger era quels? Per evitar anc ulteriuras penibladads? Ed èsi propi ina buna idea da publictar in cudesch, in cudesch cun agens texts, forsa er intims, sch'igl exista il ristg che jau ma turpegel en diesch onns la pel plaina per mes scrivlottiez? Forsa che jau duess l'emprim ina giada leger in pèr da mias columnas veglias. Sche quellas èn pli u main en urden, na stoss jau forsa tuttina betg disdir da la publicaziun da mes emprim cudesch.

\* Viola Cadruvi ha studegià germanistica, istorgia e rumantsch a l'Università da Turitg. Mintgant lavura ella vi da sia dissertaziun e mintgant sco scolasta, ma bunamain adina scriva ella.

La convivenza da las linguas e culturas en il Grischun – quai è il tema da las columnas che cumparan sut il titel «Convivenza» minga glindesdi en las gasettas «Südostschweiz» e La Quotidiana.